


## A SOUGH O' WAR


CHARLES MURRAY












National Library of Scotland
\*B000524389\*





### A SOUGH O' WAR

#### BY THE SAME AUTHOR

### HAMEWITH. 5s. net.

(13th Impression.)

'The appearance of a volume of so much genuine poetry is an important event in literary history.'—Westminster Gazette.

'No more individual or delightful collection of new Scottish poetry has appeared in our generation.'—Glasgow News.

CONSTABLE AND COMPANY LTD

## A SOUGH O' WAR BY CHARLES MURRAY


AUTHOR OF 'HAMEWITH'




LONDON
CONSTABLE AND COMPANY LTD

First published 1917

TO A YOUNG SAPPER SOMEWHERE IN FRANCE AND TO ALL IN WHATEVER AIRT UPHOLDING THE FAIR NAME AND HONOUR OF SCOTLAND



Some of these verses have already appeared in *The Times, Aberdeen University Review, Dunedin Magazine, Chambers's Journal*, and elsewhere.




YE'RE better men, ye're baulder men,
Ye're younger men forby,
Mair fit we ken than aulder men
To answer Scotland's cry.
Yet mony a chiel that's beld an' grey,
An' trauchlin' at the ploo,
Would fain fling up his tack the day
To face the frem't wi' you.
Gey short o' breath, but keen an' teuch,
It's but his birn o' days
That hauds him here by closs an' cleuch,
Lythe haughs an' heathery braes.

Wi apron neuks the lasses dicht
Their weary grutten een,
An' waukin' mithers lie at nicht
Thinkin' o' them' at's gane;
They're sad an' silent at their meat,
Saft-fittit but an' ben,
But they can thole, for they can greet,—
It's steekit teeth for men.
An' yet they're liftit up an' prood,
They've reason for their pride,
Kennin' the onsets ye've withstood,
The dirdin's ye've defied.

Tak' then for kain these strouds o' rhymes
Fae yont the shoudin' sea,
To mind ye o' the Land at times
That, thanks to you, is free.
Or, neth a lift onkent an' dour,
Whaur new starns rise an' set,
They may come in some antrin'oor,
To help ye to forget.
An' in the tongue we never tine,
In words as bairns we spak',
Here's Scotland's biddin' in a line,
'Hing in an' haiste-ye back'

### CONTENTS

				P	AGE
YE 'RE BETTER MEN	•		•	•	9
A SOUGH O' WAR .	•	•		•	13
WHA BARES A BLADE FOR	SCOT	LAND	?		15
TO THE HIN'MOST MAN			•		18
THE THRAWS O' FATE			. '		19
THE WIFE ON THE WAR					21
FAE FRANCE					24
BUNDLE AN' GO .					34
WHEN WILL THE WAR BE	BY?				36
DOCKENS AFORE HIS PEE	RS				37
AT THE LOANIN' MOU'	· · · · · · · · · · · · · · · · · ·				44
LAT'S HEAR THE PIPES					45
HAIRY HEARS FAE HAME	•				46
FURTH AGAIN .					50
GLOSSARY					51



### A SOUGH O' WAR

The corn was turnin', hairst was near,
But lang afore the scythes could start
A sough o' war gaed through the land
An' stirred it to its benmost heart.
Nae ours the blame, but when it came
We couldna pass the challenge by,
For credit o' our honest name
There could be but the ae reply.
An' buirdly men, fae strath an' glen,
An' shepherds fae the bucht an' hill,
Will show them a', whate'er befa',
Auld Scotland counts for something still

Half-mast the castle banner droops,

The Laird's lament was played yestreen,
An' mony a widowed cottar wife
Is greetin' at her shank aleen.
In Freedom's cause, for ane that fa's,
We 'll glean the glens an' send them three
To clip the reivin' eagle's claws,
An' drook his feathers i' the sea.

For gallant loons, in brochs an' toons,
Are leavin' shop an' yard an' mill,
A' keen to show baith friend an' foe,
Auld Scotland counts for something still.

The grim, grey fathers, bent wi' years,
Come stridin' through the muirland mist,
Wi' beardless lads scarce by wi' school
But eager as the lave to list.
We 've fleshed o' yore the braid claymore
On mony a bloody field afar,
But ne'er did skirlin' pipes afore
Cry on sae urgently to war.
Gin danger 's there, we 'll thole our share,
Gie 's but the weapons, we 've the will,
Ayont the main, to prove again
Auld Scotland counts for something still.

# WHA BARES A BLADE FOR SCOTLAND?

- Wha bares a blade for Scotland? she 's needin' ye sairly noo,
- What will ye dae for Scotland for a' she has dane for you?
- Think o' the auld-time slogans, the thread runnin' throu' your plaid,
- The cairns o' the Covenanters whaur the martyrs' banes are laid;
- Ay, the faith o' your godly fathers, is it naething to you the day?
- Wha bares a blade for Scotland? noo is the time to say.
- Whaur are the bairns she sheltered, the sons she was laith to lose?
- When they wandered awa' on the ootwith roads, whaurever their fancy chose;
- Are ye crowdin' the tramps an' troopers, beatin' hame wi' your hearts a-throb?
- Or speakin' as big as ever,—but nae throwin' up your job?

- Ye stand to the toast 'Wha's like us?' an' shout as ye answer 'Nane,'
- Weel, noo is the time to prove it, i' the teeth o' the warl' again.
- O ay, ye said ye were sorry when a chiel that ye kent was killed,
- But did that gar ye miss your mornin', or speir gin his place was filled?
- Ye've read aboot Bruce an' Wallace, an' the fechts that they focht langsyne,
- An' mony a tale an' ballad hauds your forbears' deeds in min';
- O, they were the lads for Scotland, they stood for her staunch an' true,
- But what o' the bairns that 's comin', will they say the same o' you?
- Ye ken o' your country's story, is this then to end it a'?
- Ye are heirs o' her auncient glory, can ye see sic a fate befa'?
- Can ye look on her purple heather, her hills an' her howes o' fame,
- An' find but a shamefu' tether that keeps ye content at hame?

Gin Death be the price o' Freedom, Death's little eneuch to pay;

Wha bares a blade for Scotland? her back's at the wa' the day.

1915.

### TO THE HIN'MOST MAN

The mist creeps up roun' the hillside sheilins,
The snaw lies deep on the distant Bens,
November skies in the wintry Hielans
Hang dull an' grey owre the lanely glens.
But still I trow fae the clachans yonder
The peat reek curls to the lift the same;
An' far an' wide tho' our footsteps wander,
Our hearts still turn to the auld Scots Hame.
North or South as our Fate may find us,
East or Wast as our Luck may lan',
Send but the cry, an' abreist ye bind us—
Scotland yet!—to the hin'most man.

### THE THRAWS O' FATE

HAD I been born in auchty instead o' saxty-three,

Ye wouldna fin' me pu'in' neeps at hame

But plashin' throu' the boggy haughs in Flanders owre the sea,

Whaur cairn an' cross still tell oor forebears' fame,

An' layin' on wi' dunt for daud until the foemen flee,

Had I been born in auchty an' nae in saxtythree.

Had Jean ta'en me in ninety instead o' ninetynine,

Oor loon would noo be auld eneuch to list,

Gin he was yonner yarkin' on hale-heartit for the Rhine

I wouldna aye be thinkin' I was miss't.

An' prood an' anxious we would be wi' Donal in the line,

Had I got Jean in ninety instead o' ninety-nine.

Had I been born in saev'nty an' wed in ninetytwa,

The loon an' me had sodgered wi' the rest,

To houk oor trench an' haud it there the mauger o' them a',

An' mairch an' chairge as bauldly as the best, An' Jean would dicht a dowie e'e wi' baith her men awa'.

Had I been born in saev'nty an' wed in ninetytwa.

But I was born owre early an' Donal far owre late,

Sae we maun soss awa' amo' the kye;

I gang nae mair to markets, o' kirk I've tint the gait,

At smiddy an' at mill I hear the cry

For men, an' here I hing my heid an' ban the thraws o' fate,

That I was born sae early an' Donal cam' sae late.

1915.

### THE WIFE ON THE WAR

The wifie was thrang wi' the coggin' o' caur,
An' makin' new cheese an' the yirnin' o't,

But when the guidman loot a wird aboot war She fairly got on to the girnin' o't.

'Deil birst them,' quo' she, 'I would pit them in jyle

Oonless they gie owre wi' the killin' o't, We 've wantit bear-meal for oor bannocks this fyle,

There 's nane left to leuk to the millin' o't.

An' bide ye, ye 'll see, gin this fechtin' hauds on

The hale quintra side will be ruein' o't,

There's nae teucher ley than oor ain on the Don

An' fa 's gyaun to tackle the plooin' o't? They chairge noo for preens, an' the merchants mainteen

That naething but war is the rizzen o't, Dyod! the nation that winna lat ithers aleen Deserves a lang knife in the wizzen o't.

### 22 THE WIFE ON THE WAR

But it blecks me to see fat it maitters to hiz Gin Kaiser or Tsar hae the wytin' o't,

Gin the tane taks a tit at the tither chiel's niz

Need we hae a han' at the snytin' o't? Syne see the fite siller on papers ye spen',

The time that ye connach at readin' o't, Wi' specs on, ye hunker for 'oors upon en',

The wark 's left to me an' the speedin' o't.'

The aul' man is kittle, he raise on the runt—
'Ye jaud, wi' your tongue an' the clackin'
o't,

Were ye whaur I wish—in a trench at the front—

Nae German would stamach the takin' o't.

I tell ye, ye beesom, oonless 'at oor loons Oot yonner can gie them a lickin' o't,

They 'll lan' i' their thoosans an' blaw doon oor toons,

An' start to the stealin' an' stickin' o't.

Syne, Lord! I can see ye, gyaun doon the neep dreels,

Wi' barely a steek for the happin' o't,

An' a lang soople sodger that 's hard at your heels

Wi' a dirk i' your ribs for the stappin' o't,

They'll nail your twa lugs to the muckle mill door,

Like a futtrat that 's come to the skinnin' o't,

An' thraw your deucks' necks an' mak' broth o' your caur—

Pit that on your reel for the spinnin' o't.'
'Haud, haud,' quo' the wifie, 'ye're fleggin'
us a',

Come haiste ye, gin that be the meanin' o't, Rax doon the aul' gun fae the crap o' the wa', It's time ye set on to the cleanin' o't—

Ye are were richt deidly at doos an' at craws, An' skeely at Yeel at the sheetin' o't—

Gie me syne the chapper, we 'll fell them in raws, An' leave them sma' brag o' the meetin' o't.

Gin mornin' was come, seen as ever it 's licht, Sen' Rob to the sergeant for dreelin' o't,

An' the deemie will start wyvin' mittens the nicht,—

I 've a stockin' mysel' at the heelin' o't. An' noo jist to cantle oor courage a bit,

An' haud the hairt stoot in the bodie o't,

Fesh oot the black pig, there 's a drap in her yet,
An' I'll get the teels to mak' toddy o't.'

#### FAE FRANCE

- DEAR JOCK—Like some aul' cairter's mear I 'm foonert i' the feet,
- An' oxter-staffs are feckless things fan a' the furth 's sae weet,
- Sae, till the wee reid-heidit nurse comes roon to sort my bed,
- I 'll leave my readin' for a fyle, an' vreet to you instead.
- Ye hard the claik hoo Germany gied France the coordy lick,
- An' Scotlan' preen't her wincey up an' intill't geyan quick—
- But fouk wi' better thooms than me can redd the raivell't snorl,
- An' tell ye fa begood the ploy that sae upset the worl'.
- I ken that I cam' here awa' some aucht days aifter Yeel,

- An' never toon nor fee afore has shootit me sae weel;
- They gie me maet, an' beets an' claes, wi' fyles an antrin dram—
- Come term-time lat them flit 'at likes, I'm bidin' faur I am.
- Tho' noo an' than, wi' dreepin' sark, we 've biggit dykes an' dell't—
- That's orra wark; oor daily darg is fechtin' fan we're tell't.
- I full my pipe wi' bogie-rowe, an' birze the dottle doon,
- Syne snicher, as I crack the spunk, to think hoo things come roon;
- There's me, fan but a bairn in cotts, nae big aneuch to herd,
- Would seener steek my nieves an' fecht, than dook or ca' my gird,
- An' mony a yark an' ruggit lug I got to gar me gree,
- But here, oonless I'm layin' on, I'm seldom latten be.
- As I grew up an' filled my breeks, fyow market days we saw

- But me an' some stoot halflin chiel would swap a skelp or twa;
- It's three year by come Can'lemas, as I've gweed cause to min',
- That Mains's man an' me fell oot, an' focht about a queyn.
- We left the inn an' cuist oor quytes ahin' the village crafts,
- An' tho' I barely fell't him twice wi' wallops roon the chafts,
- I had to face the Shirra for 't. 'Twas byous hard on me,
- For fat wi' lawyers, drinks, an' fine, it took a sax months' fee.
- I would a had to sell't my verge, or smoke a raith on tick,
- But for the fleein' merchant's cairt, my ferrets an' the bick.
- Ay, sang! the Shirra had the gift, an' tongued me up an' doon;
- But he's a dummy till his sin, fan han'lin' oor platoon;
- Gin's fader saw his birkie noo, an' hard the wye he bans,
- He michtna be sae sair on some that fyles comes throu' his han's,

- Ae mochie nicht he creepit ben the trench—
  it 's jist a drain—
- An' kickit me aneth the quyte an' cursed me braw an' plain—
- 'Ye eesless, idle, poachin' hurb, ye're lyin' snorin' there,
- An' Germans cryin' to be killed, but deil a hair ye care.
- Fatever comes ye're for the lythe, to scrat, an' gant an' drink,
- An' dream aboot the raffy days fan ye was i' the clink;
- Ye're dubbit to the een, ye slype, ye hinna focht the day,
- Come on wi' me an' see for eence gin ye are worth yer pay.'
- Man, fan he spak' sae kindly like, fat was there left for me
- But jist to answer back as frank, as furth-thegait an' free—
- 'Lead on, my Shirra's offisher, gin summons ye 've to ser'
- Upon that billies owre the loan, I'll beet ye I'll be there'!
- Syne laden wi' a birn o' bombs we slippit throu' the dark,

- An' left upo' the barbit weer gey taits o' breek an' sark;
- They bummed an' droned some unco tune as we crap up; it raise
- Like fae the laft I 've hard the quire lift up some paraphrase.
- Ae creeshy gurk that led the lave was bessin' lood an' strang,
- Fan something hat him i' the kyte that fairly changed his sang;
- We henched an' flang, an' killed a curn, an' soosh't them front an' flank,
- Like loons that's trued the squeel to stane young puddocks i' the stank.
- The rippit spread, the rockets raise; 'twas time for hiz to skice,
- An' tho' we joukit as we ran, an' flappit eence or twice,
- Owre aft oor pig gaed to the wall, for noo we strack the day—
- Oor brow Lieutenant onywye—fan a' in lames it lay;
- A bullet bored him throu' the hochs, it took him like a stane,

- An' heelster-gowdie doon he cam' an' brak his shackle-bane:
- To hyste him up an' on my back nott a' my pith an' skeel,
- For aye he bad' me lat him lie, an' cursed me for a feel.
- 'Ging on an' leave me here, ye gype, an' mak' yer feet yer freen'.'
- 'Na, na,' says I; 'ye brocht me here, I'm nae gyaun hame my leen.'
- He's little boukit, ay an' licht, an' I'm baith stoot an' swak,
- Yet I was pechin' sair aneuch afore I got him back.
- They thocht him fairly throu' at first, an' threepit he was deid,
- But it was naething but a dwaam, brocht on by loss o' bleed.
- 'Twas months afore he cower'd fae that, an' he was missed a lot,
- For fan ye meet a hearty breet ye 're sorry gin he 's shot.
- His mither sent a letter till's, a great lang blottit screed,
- It wasna easy makin't oot, her vreetin's coorse to read;

- She speir't could she dae ocht for me, sae I sent back a line—
- ' Jist bid yer man, fan neist I 'm up, ca' canny wi' the fine.'
- But noo to tell hoo I wan aff fae dreelin', dubs, an' din,
- An' landit here wi' nocht to dae but fite the idle pin.
- Ae foraneen my neiper chap cried—'Loshtiegoshtie guide's!
- The fourarts maun be caul the day, they 've startit burnin' wydes.'
- The reek at first was like ye 've seen, fan at the fairmer's biddin',
- Some frosty mornin' wi' the graip, the baillie turns the midden.
- But it grew thick, an' doon the win' straucht for oor lines it bore,
- Till shortly we were pyoch'rin' sair an' fleyed that we would smore;
- An' as ye never ken wi' cyaurds faur ye'll be herried neist,
- We fixed oor baignets, speel't the trench, and chairged them in a breist.

- 'Twas than I got the skirp o' shell that nail't me i' the queets,
- An' here I 'm hirplin' roon the doors, an' canna thole my beets.
- Some nichts fan I've been sleepin' ill, an' stouns gyaun doon my taes,
- Aul' times come reamin' throu' my heid, I'm back amo' the braes;
- Wi' wirms an' wan' I 'm throu' the breem, an' castin' up the burn,
- Land aye the tither yallow troot, fae ilka rush an' turn:
- I hash the neeps an' full the skull, an' bin' the lowin' nowt,
- Lythe in the barn lat oot for rapes, or track a fashious cowt;
- I watch the leevers o' the mull swing roon for 'oors an' 'oors,
- An' see the paps o' Bennachie stan' up atween the shooers;
- Lead fae a roup a reistin' stirk, that 's like to brak the branks,
- Or hearken to the cottar wives lyaug-lyaugin' owre their shanks;

- I join the dancers on the buird schottischin' at the games,
- An' scutter in the lang forenichts wi' britchin, bit, an' haims;
- Or maybe, cockit on the shaft, fan cairtin' corn or bear,
- Cry 'Hie' an' 'Wo' an' 'Weesh' again to guide the steppin' mear.
- An' in the daylicht tee, at times, fan lyin' here sae saft,
- I 've dream't, gin eence the war was by, o' takin' on a craft.
- Fan a'thing's sattled for the nicht in stable an' in byre,
- It's fine to hae yer ain bow-cheer drawn up anent the fire,
- An' hear a roch reid-heidit bairn, wi' fernytickled nose,
- Tired oot an' hungry fae the closs, come yaummerin' for his brose;
- An' syne a wife—but, weesht! for here's my nurse, the couthy ted,
- Come cryin' I maun dicht my pen, an' hirsle to my bed.
- Gweed nicht!—but bide, or I forget; there's jist ae little thing—

Man, could ye sen' me oot a trumpe? I'm weariet for a spring.

For, Jock, ye winna grudge the stamp to cheer a dweeble frien',

An' dinna back it 'Sandy' noo, but 'Sergeant' Aberdein.

1916.

#### BUNDLE AN' GO

It's 'Bundle an' go,' an' goodbye to the harrow, Fareweel to the reaper, the rake an' the ploo,

I 'm throu' wi' the spaad, an' the graip an' the barrow,

An' naething will ser' me but sodgerin' noo. Sodgerin' noo.

The grieve canna haud me fae sodgerin' noo.

I 'm tired o' the stable, its brushin' an' bleckin', O' feein' an' flittin', an' cairtin' my kist,

I 'm weariet o' sawin', an' sievin' an' seckin',
I 've seen my last lowsin', I 'm leavin' to list.

Leavin' to list.

As soon as I 'm suppered I 'm leavin' to list.

The snaw's lyin' deep by the dyke faur it driftit,

The Spring fan it comes will be cankert an' weet,

The yokin' half throu' aye afore the mist's liftit,

There may be a sun but it 's seldom we see 't. Seldom we see 't.

We hear o' the sun but it 's seldom we see 't.

The lass I was coortin' has mairriet the miller,
A dusty dour deevil, as bide ye she'll see,

But noo she's awa' it's a savin' o' siller,

Nae mair she 'll get fine readin' sweeties fae me.

Sweeties fae me.

The times she got quarters o' sweeties fae me!

I 've focht wi' the weather, the wark an' the weemen,

Till faith I 'm in fettle for facin' the foe.

An' waukin' or dreamin' I hear the pipes screamin'

'Hie, Jock, are ye ready to bundle an' go?'
Bundle an' go.

Wha bides fan the pipes bid him 'Bundle an' go'?

# WHEN WILL THE WAR BE BY?

'This year, neist year, sometime, never,'
A lanely lass, bringing hame the kye,
Pu's at a floo'er wi' a weary sigh,
An' laich, laich, she is coontin' ever
'This year, neist year, sometime, never,
When will the war be by?'

'Weel, wounded, missin', deid,'
Is there nae news o' oor lads ava?
Are they hale an' fere that are hine awa'?
A lass raxed oot for the list, to read—
'Weel, wounded, missin', deid';
An' the war was by for twa.

1916.

(Exemption Tribunal)

- NAE sign o' thow yet. Ay, that 's me, John Watt o' Dockenhill:
- We've had the war throu, han' afore, at markets owre a gill.
- O ay, I'll sit, birze ben a bit. Hae, Briggie, pass the snuff;
- Ye winna hinner lang wi' me, an' speer a lot o' buff,
- For I 've to see the saiddler yet, an' Watchie, honest stock,
- To gar him sen' his prentice up to sort the muckle knock,
- Syne cry upo' the banker's wife an' leave some settin' eggs,
- An' tell the ferrier o' the quake that's vrang about the legs.
- It's yafa wedder, Mains, for Mairch, wi' snaw an' frost an' win',
- The ploos are roustin' i' the fur, an' a' the wark 's ahin'.

- Ye've grun yersels an' ken the tyauve it is to wirk a ferm,
- An' a' the fash we 've had wi' fouk gyaun aff afore the term;
- We've nane to spare for sojerin', that's nae oor wark ava,
- We 've rents to pey, an' beasts to feed, an' corn to sell an' saw;
- Oonless we get the seed in seen, faur will we be for meal?
- An' faur will London get the beef they leuk for aye at Yeel?
- There 's men aneuch in sooters' shops, an' chiels in masons' yards,
- An' coonter-loupers, sklaters, vrichts, an' quarrymen, an' cyaurds,
- To fill a reg'ment in a week, without gyaun vera far,
- Jist shove them in ahin' the pipes, an' tell them that it's 'War';
- For gin aul' Scotland's at the bit, there's naething for't but list.
- Some mayna like it vera sair, but never heed, insist.
- Bit, feich, I'm haverin' on like this, an' a' I need's a line

- To say there 's men that maun be left, an' ye 've exemptit mine.
- Fat said ye? Fatna fouk hae I enoo' at Dockenhill?
- It's just a wastrie o' your time, to rin them throu', but still—
- First there's the wife—'Pass her,' ye say.
  Saul! had she been a lass
- Ye hadna rappit oot sae quick, young laird, to lat her pass,
- That may be hoo ye spak' the streen, fan ye was playin' cairds,
- But seein' tenants tak' at times their menners fae their lairds,
- I 'll tell ye this, for sense an' thrift, for skeel wi' hens an' caur,
- Gin ye'd her marrow for a wife, ye woudna be the waur.
- Oor maiden 's neist, ye 've heard o' her, new hame fae buirdin' squeel,
- Faur she saw mair o' beuks than broth, an' noo she 's never weel,
- But fan she 's playin' ben the hoose, there 's little wird o' dwaams.
- For she's the rin o' a' the tunes, strathspeys, an' sangs, an' psalms;

- O' 'Evan' an' 'Neander' baith, ye seen can hae aneuch,
- But 'Hobble Jennie' gars me loup, an' crack my thooms, an' hooch.
- Weel, syne we hae the kitchie deem, that milks an' mak's the maet,
- She disna aft haud doon the deese, she's at it ear' an' late,
- She cairries seed, an' braks the muck, an' gies a han' to hyow,
- An' churns, an' bakes, an' syes the so'ens, an' fyles there 's peats to rowe.
- An' fan the maiden's friens cry in, she 'll mask a cup o' tay,
- An' butter scones, an' dicht her face, an' cairry ben the tray.
- She 's big an' brosy, reid and roch, an' swippert as she 's stoot,
- Gie her a kilt instead o' cotts, an' thon 's the gran' recruit.
- There 's Francie syne, oor auldest loon, we pat him on for grieve,
- An', fegs, we would be in a soss, gin he should up an' leave;
- He's eident, an' has lots o' can, an' cheery wi' the men,

- An' I 'm sae muckle oot aboot wi' markets till atten'.
- We've twa chaps syne to wirk the horse, as sweir as sweir can be,
- They fussle better than they ploo, they 're aul' an' mairret tee,
- An' baith hae hooses on the ferm, an' Francie never kens
- Foo muckle corn gyangs hame at nicht, to fatten up their hens.
- The baillie syne, a peer-hoose geet, nae better than a feel,
- He slivvers, an' has sic a mant, an' ae clog-fit as weel;
- He's barely sense to muck the byre, an' cairry in the scull,
- An' park the kye, an' cogue the caur, an' scutter wi' the bull.
- Weel, that 's them a'—I didna hear—the laadie i' the gig?
- That 's Johnnie, he 's a littlan jist, for a' he leuks sae big.
- Fy na, he isna twenty yet—ay, weel, he's maybe near't;
- Owre young to lippen wi' a gun, the crater would be fear't.

- He 's hardly throu' his squeelin' yet, an' noo we hae a plan
- To lat him simmer i' the toon, an' learn to mizzer lan'.
- Fat? Gar him list! Oor laadie list? 'Twould kill his mither, that,
- To think o' Johnnie in a trench awa' in fatye-ca't;
- We would hae sic a miss at hame, gin he was hine awa',
- We'd raither lat ye clean the toon o' ony ither twa;
- Ay, tak the wife, the dother, deem, the baillie . wi' the mant,
- Tak' Francie, an' the mairret men, but John we canna want.
- Fat does he dee? Ye micht as weel speir fat I dee mysel',
- The things he hasna time to dee is easier to tell;
- He dells the yard, an' wi' the scythe cuts tansies on the brae,
- An' fan a ruck gyangs throu' the mull, he's thrang at wispin' strae,
- He sits aside me at the mart, an' fan a feeder's sell't

- Taks doon the wecht, an' leuks the beuk for fat it's worth fan fell't;
- He helps me to redd up the dask, he taks a han' at loo,
- An' sorts the shalt, an' yokes the gig, an' drives me fan I 'm fou.
- Hoot, Mains, hae mind, I 'm doon for you some sma' thing wi' the bank;
- Aul' Larickleys, I saw you throu', an' this is a' my thank;
- An' Gutteryloan, that time ye broke, to Dockenhill ye cam'—
- 'Total Exemption.' Thank ye, sirs. Fat say ye till a dram?

March 1916.

# AT THE LOANIN' MOU'

The tears were drappin' fae baith her een, When I was sayin' 'Goodbye' the streen, An' we baith were wae as we weel micht be, The wife at the mou' o' the loan an' me.

Yet what could I do at a time like this But lift her chin for a pairtin' kiss, An' leave her to look to the bairns an' kye, An' warsle her lane till the war was by?

Wi' the country cryin' for mair to come, What man could bide at the lug o' the lum, Or sleep upon feathers or caff for shame To think he was lyin' sae saft at hame?

What scaith may come man canna foresee, But naething waur can a mortal dree Than leavin' a wife at a time like noo, Greetin' her lane at the loanin' mou'.

## LAT'S HEAR THE PIPES

Lat's hear the pipes. When Daavit soothed the king

An' thoomed the harp, an' flang aside the sling, Baith Saul an' Psalmist had come better speed

Wi' some brisk port upo' the chanter reed,— The lad's brogue beatin' to the dirlin' spring.

A mither's diddlin', till her bairn can bring The sleep that flees fae fussle, trumpe or string, But gin ye 'd heeze the hert, an' stir the bleed, Lat 's hear the pipes.

Nae liltin' lasses gar the gloamin's ring, Auld men an' frail maun face the furth's onding

At scythe an' ploo, for mony a lad lies deid Whaur nae Scots divot kindly haps his heid. In dowie days, when few hae hert to sing,

Lat's hear the pipes.

1916.

#### HAIRY HEARS FAE HAME

The aul' man starts, gey grumlie as ye see,
Syne the gweed-wife taks haud an' cairries on,
Mary, the neiper lass pits something tee,
An' last comes Sandy—he's a nickum thon.

#### The Aul' Man.

There 's naething new, excep' that ye 're awa';
Fae year to year it 's aye the same aul' thing,
Up to the gartens twa-three months in snaw,
Syne rivin' win's that tirr the byres in Spring;
A caul' coorse Simmer, only gweed for girse,
An' Hairst is on ye or ye hardly ken;
Rent day an' reekin' rucks set up your birss,
An' there ye are amo' the snaw again.

Roon rowes the sizzens, Life rowes roon the same;

A bairn is born, is spean't an' into breeks, Wydes throu' the carritches, an' leavin' hame Fees, an' afore his feerin's straucht, he seeks A cottar hoose to haud as daft a queyn; He dargs an' stairves; a hoast brings on the en'.

An' comin' fae the fun'ral some day syne, Ye hear the howdie's on the go again.

# The Gweed-wife.

Ye ken your father, never heed him, Hairy, He vreets like that to hod his kindly hert; Fan he was cairryin' on the nicht wi' Mary, It micht hae been yoursel', for a' the airt. He sat an' dried his nepkin there an' jokit, An' aye as gweed's he gied she gar't him tak', But, fegs, she got the reid face fan he vokit To speer about her plans fan ve cam' back.

An' ilka day afore he taks his denner, He's doon the closs to see if Postie's come, An' brawly we can tell ye fae his menner Foo things are gyaun atween the sea an' Somme.

Upo' the bed-lids i' the ben, wi' batter He's stucken maps, a' jobbit owre wi' flags, An' gin the Gordons gar the Germans scatter, Ye'd think he'd deen't himsel', the wye he brags.

### 48 HAIRY HEARS FAE HAME

Mary the Lass.

My sodger laad, set on till't by your mither,
I'm eekin' oot her letter wi' a line,
Till Sandy's free to see me throu' the heather,—
He's never sweer to convoy 'Hairy's queyn.'
Your father's creepin' doon, but aye keeps
cheery.

An' tyauves awa', fae mornin' on till mirk; Lang-lies are nae for him, hooever weary, Nae winner fyles he's gantin' i' the kirk.

Your mither wyves, to haud her aff the thinkin',
The sheath is seldom fae her apron string,
But shank's ye like, it's nae like men wi'
drinkin',

It disna ease the hert nor sorrow ding.

There 's only ae thing ilka day that maitters,
An' that 's gin ony news has come fae you;
An', O my laad, there 's bits fyles in your letters
I'd gie a lot to get by wird o' mou'.

# Sandy—a nickum thon.

Hairy, ye beggar, fegs an' ye 're the buckie, Bidin' awa' sae lang,—but ach! we ken The aul'est sons are aye the anes that 's lucky, They aye come first, an' get the far'est ben. Here's me, that's cairryin' on the ferm an' wirkin',

An' a' I get for that 's my claes an' kail, While ye 're oot there, jist sheetin' guns an' dirkin',

An' riftin' owre your raffy beef an' ale.

Come hame, min; sattle doon an' mairry Mary,— Oonless ye're lair't in some saft bog in France;

We hear ye're pushin' on, but are ye, Hairy?

It's time they gied hiz younger chaps a chance.

At onyrate, to shame the coordy footers,
That winna list, fooever great the need,
Sen' something hame, to show them at the
sooter's,—

A weel-cloured German helmet or a heid.

#### FURTH AGAIN

YE'RE hardly hame till furth again
It's buckle the brogues an' fare
To the wearimost ends o' the earth again,
An' the wark that is waitin' there.
Ye are keen to gang, but it's lane an' lang
Lies ever the ootwith track,
An' it's guid to mind there are frien's behind
Aye wishin' ye weel,—an' back.

#### GLOSSARY

Antrin, occasional.

Back it, address it. Baillie, cattleman. Batter, paste. Bed-lids, doors of box-bed. Beet, bet. Beld, bald. Bessin', singing bass. Bick, bitch. Birn, burden. Birss, bristles. Birze, squeeze. Bleck, bleckin', black, blacking. Boukit, large, bulky. Bow-cheer, armchair. Branks, halter. Breet, brute. Britchin, portion of harness. Broke, became bankrupt. Bucht, a sheep or cattle-fold. Buckie, refractory or mischievous person. Buff, nonsense. Byous, exceedingly, out of the common.

Caff, chaff.
Can, ability.
Cankert, ill-humoured, fretful.
Cantle, to lift or brighten up.



Carritches, catechism.

Caur, calves.

Chafts, chops.

Chapper, beetle for mashing potatoes.

Claik, gossip.

Cleuch, narrow glen, ravine.

Clog-fit, club-foot.

Coggin', feeding from the cog or wooden pail.

Connach, to waste, to destroy.

Coordy-lick, coward's blow.

Cotts, petticoats.

Crap o' the wa', highest part of an inside wall.

Creeshy, greasy.

Curn, a quantity of indefinite size or number.

Cyaurd, tinker, sturdy beggar.

Darg, a day's work.

Daud, a heavy blow.

Deese, a long wooden settle.

Dell't, dug.

Diddlin', singing in a low tone without words.

Ding, a blow, to dash down.

Dirdin', onslaught.

Dook, bathe.

Dottle, the unconsumed tobacco remaining in a pipe.

Dreels, drills.

Dubbit, muddied.

Dunt, a blow.

Dwaam, a faint.

Dweeble, weak.

Eekin', adding to.

Feerin', the furrow drawn out to mark the 'rigs' before ploughing the whole field.

Fegs, an interjection; used for 'faith.' Fell't, knocked down. Ferny-tickled, freckled. Ferrier, farrier, veterinary surgeon. Fite the idle pin, a way of passing time. Fleggit, frightened. Fleved, frightened. Foonert, foundered, broken down. Footers, a term of contempt. Foumart, polecat. Frem't, strangers; foreigners. Furth, forth, the open air. Fussle, whistle. Futtrat, weasel. Fyle, while.

Gant, yawn. Geet, child. Girnin', snarling. Girse, grass. Graip, three or four-pronged fork used in farming. Grumlie, fault-finding. Gurk, a fat short person. Gype, a fool.

Haims, curved pieces of iron attached to horse's collar Hale an' fere, whole and entire. Heelster-gowdie, heels over head.

Heese, to lift, to exalt.

Henched, to launch missiles by striking the hand against the thigh.

Hirsle, to move with grazing or friction.

Hiz, us.

Hoast, cough.

Hochs, lower part of thighs.

Howdie, midwife.

Howes, hollows.

Hunker, to squat on the haunches.

Hurb, a term of contempt.

Hyow, hoe.

Jobbit, pricked. Jyle, gaol.

Kain, rent paid in kind.

Kittle, excitable, quick-tempered.

Knock, clock.

Kyte, belly.

Laich, low.
Lair't, stuck in mud.
Ley, grass land.
Loan, piece of uncultivated land about a homestead.
Lowsin', leaving off work.
Lyaug, gossip.
Lythe, shelter.

Mant, stutter.

Mask, to infuse tea.

Mauger, in spite of.

Mochie, muggy.

Mornin', morning dram.

Mou', mouth.

Neiper, neighbour. Nickum, mischievous boy.

On-ding, a heavy fall of rain or snow. Oxter-staffs, crutches.

Pechin', panting.
Peer-hoose, work-house.
Pig, earthenware jar.
Ploy, escapade.
Port, a lively tune on the bagpipes.
Pu'in', pulling.
Pyoch'rin', coughing.

Quake, heifer. Queets, ankles. Queyn, young woman. Quyte, coat.

Raffy, plentiful.
Raith, quarter of a year.
Raxed, stretched.
Reistin', restive.
Rippit, uproar.
Roch, rough.
Roustin', rusting.
Rowe, roll.
Runt, withered hag.

Shackle-bane, wrist-bone.
Shank, knitting, to knit.
Sheath, holder for needles during knitting.
Shoudin', swinging.
Skice, to run off quickly.
Skull, a wicker basket.
Slype, worthless fellow.
Smore, smother.
Snorl, a difficulty.
Snytin', blowing the nose with finger and thumb.
Sooste, cobbler.

Soss, a mess.
Sough, rumour, sound of wind.
Spring, a tune.
Squeel, school.
Stank, pond, ditch.
Steek, stitch.
Stroud, senseless silly song.
Stucken, stuck.
Swak, supple.
Sweeties, readin', conversation lozenges.
Sweir, lazv.

Tack, lease.
Taits, locks, small portions.
Teels, tools.
Teuch, tough.
Thow, thaw.
Thraw, twist.
Threepit, insisted.
Trauchlin', draggling.
Trued, played truant.
Trumpe, jew's harp.
Tyauve, a struggle.

Verge, watch with verge movement.

Warsle, to wrestle, to strive.
Wastrie, a waste.
Wydes, weeds.
Wytin', blame.
Wyvin', knitting, weaving.









